



Komunikado di prensa 2015-010

Di akuerdo ku presidente di Banko Sentral: Den nos union monetario, e sektor finansiero ta stabil

WILLEMSTAD/PHILIPSBURG – “E riesgo den nos sektor bankario, sektor di seguro i fondonan di penshun a keda stabil durante último añanan,” dr. Emsley Tromp, presidente di Banko Sentral di Kòrsou i Sint Maarten a splika den e informe anual 2014 di Banko Sentral. “Ounke e riesgo di stabilitat finansiero global a oumentá, e influensha di esaki riba stabilitat di nos union monetario por wòrdu konsiderá limitá pa motibu di e karakter konservativo di nos sektor finansiero. E vulnerabilidad eksterno ku ta resultá di shòknan eksterno for di nos partnernan di negoshi mas importante ta wòrdu reflehá den nos ambiente makroekonómiko i ta indiká un oumento di riesgo,” e la añadí.

Dr. Tromp a atvertí sinembargo ku e nos ekonomia ta kayendo atras riba nos kresementu potensial i a enfatisá e importansha pa maneho dirigí di gobièrnu. “E ambiente makroekonómiko ta wòrdu evaluá dor di entre otro analisá e tendensha di desaroyo ekonómiko riba tèrmino largu inkluso kambionan di maneho struktural,” e la splika. “E ‘output gap’ di nos union monetario ku ta wòrdu definí komo e diferensha entre e Produkto Interno Bruto aktual i esun potensial komo porsentahe di e Produkto Interno Bruto potensial tabata un biaha mas negativo na 2014 (-1,92%). E oumento den e diferensha negativo aki ta demostrá ku nos ekonomia ta kayendo atras riba nos kresementu potensial i ta enfatisá e importansha pa maneho dirigí di gobièrnu.”

E presidente di Banko Sentral a indiká ku riba tereno di stabilitat finansiero, Banko Sentral ta implementá un strategia makroprudenshal ku ta integrá e supervishon tradishonal mikroprudenshal di institutonan ku e maneho monetario. Esaki tin komo meta influenshá e sistema finansiero i su stabilitat pa medio di regulashon i supervishon. E ‘Early Warning Monitoring System’ di Banko ku ta analisá e fuentenan potensial di riesgo sistémiko ta indiká ku den e union monetario di Kòrsou i Sint Maarten, e ambiente makroekonómiko ta kousa e mayor riesgo pa stabilitat finansiero, sigui pa e solvabilidad di e gobièrnunan di Kòrsou i Sint Maarten.”

“Konforme e kontrakshon ekonómiko registrá den union monetario durante 2014, rentabilidad neto di e sektor bankario komersial a kai. Sinembargo, e indikadónan di stabilitat finansiero ta indiká ku e sektor bankario komersial ta ainda stabil i salú,” Tromp a indiká. “E ratio di kapital adekuá ta mas haltu ku e norma di 8% di Basel. Ademas, e riesgo di kapital adekuá, kalidat di aktivonan, likides & “funding” i e riesgo di

kapital a keda stabil na 2014 kompará ku 2013, miéntras ku e riesgo di entrada i rentabilidad a oumentá. Pa mantené stabilitat finansiero ta importante pa e sektor bankario lokal ta stabil i salú, ya ku aktivanan di e sektor aki ta representá 57% di tur e aktivanan di e sistema finansiero i konsekuentemente e sektor ta duna e kontribushon mas grandi na desaroyo finansiero di Kòrsou i Sint Maarten.”

Sifranan di e sektor di seguro i fondonan di penshon ta wòrdu presentá ku un retraso di un aña. Durante 2013, tantu e sektor di seguro di bida komo e sektor di seguro general a registrá un kaida den rentabilidad, Tromp a splika. “Den e sektor di seguro general, riesgo di entrada & rentabilidad i riesgo di kalidat di aktivanan a oumentá miéntras ku e riesgo di merkado a baha. E riesgonan di likides i kapasidat a keda stabil. E sektor di seguro di bida a registrá un oumento di riesgo di kapasidat i riesgo di entrada i rentabilidad, miéntras ku e riesgo di kalidat di aktivanan, riesgo di merkado i stabilitat a keda stabil”.

Mientrastantu, durante 2013 e tasa di kobertura di e fondonan di penshun a keda stabil na 107% kompará ku 2012. Esaki ta mas haltu ku e 100% rekerí. E riesgo di entrada i rentabilidad di e sektor a oumentá miéntras ku e “risk to equity” a kai. E otro indikadónan di riesgo a keda stabil,” dr. Tromp a konkluí bisando.

Willemstad, 15 yüli 2015

CENTRALE BANK VAN CURACAO EN SINT MAARTEN